



Autoritads e responsabels da Furlans, Ladins da las Dolomitas e Rumantschs davant la fatschada da la Villa Manin.

FOTOS A. BEELI ED MAD



La Villa Manin a Codroipo è in dals bains culturals pli importants dal Friaul. Igl era pli baud la residenza da stad dals regents venezians.



Rina Steier ha segnà en num da la Lia rumantscha il document final dal congress interladin a Codroipo.

Agir en il temp da la «glocalisaziun»

En l'Italia ha già lieu in congress interladin da Furlans, Ladins e Rumantschs

■ (abc) Il mund ladin basegna promozion. El duai vegnir resguarda andantamain en la vita publica: A quella conclusiun vegnan ils radund 80 participantas e participants d'in congress inter-ladin che ha già lieu la fin da l'emna passada a Codroipo, en vischinanza dad Udine. Era ina delegaziun grischuna è stada preschenta giu en il Friaul. En il «davos chantun» en il nordost da l'Italia, tranter Slove-

nia/Jugoslavia, Austria ed il Veneto, han ils Furlans adina sa senti sco atgna cuminanza etnica. Che quai è effettivamain uschia han ins udì bleras giadas en il decurs dal congress da la fin d'emna passada. Radund 80 umens e dunnas da politica, furmaziun e cultura furlana èn s'inscuntrads ad in congress inter-ladin da quatter dis organiñis da l'*«Istitùt Ladin-Furlan Pre Checo Placerean»*. Da venderdi enfin dumengia han già lieu sis lavoratoris. Quels èn stads deditgads a temas che han connex cun linguatg e cultura da Furlans, Ladins e Retoromantschs. Experts e glieud da la pratica han tegnì referats ed han discutà davart medis da massa, scola, legislaziun e tradiziuns popularas.

Emprims contacts già l'onn 1956

Durant ils dis da l'avur han ins già chascun da vesair cuminaivladads, problems e fermezzas da quellas traïs minoritads parentadas. Sco quai che *Giovanni Frau*, il president dal «Osserva-

tòrio della lingua e della cultura friulane», ha ditg tar l'inauguraziun dal congress, han quels contacts cumenzà già baud. Frau sa ragorda da l'inscunter da l'onn 1956 cun l'antéier president da la LR, Gian Ratti. Tuttina sco ins sa barattar experientschas e vesair problems, cun ils quals minoritads linguisticas èn confruntads, giascha ina fermezza en las cuminaivladads interladinas.

Ils Furlans èn bilings. Talian èl linguatg dal paun e furlan il linguatg da l'olma e dal cor. Ils Ladins da las Dolomitas èn schizunt trilings, els ston sa mover cun ladin, talian e tudestg. En il futur vulan ils Furlans promover questa atgna identidad. *Rina Steier-Peduzzi*, suprastanta da la Lia rumantscha, ha preschentà l'organisaziun tetgalà dals Rumantschs. *Ivo Berther*, incaricà per dumondas da linguatg dal chantun Grischun, è viagià giu en il Friaul sco delegà da cusselgier guvernativ *Claudio Lardi*. Dus auters giasts dal Grischun, *Jon Manatschal* dal Radio

Rumantsch ed *Augustin Beeli* da La Quotidiana, han preschentà als Furlans lur instituziuns. *Bartholomé Tscharner*, *Guio Sobiela-Caanitz* e *Jean-Jacques Furer* han complettà la delegaziun retoromantscha en lur funzioni sco sociolinguists respectiv delegà da l'inspectur da scola.

«En il micro giascha il macro»

Ina giasetta dal di, betg da discuter d'in emettur da radio en lur linguatg, manca ad els. Quai che n'exista anc betg, vulan ils Furlans dentant stgaffir. Quest pievel neolatin sa chatta en ina fasa fitg activa da svilup linguistic. Durant il congress a Codroipo han ins senti bler euforismem per l'atgna cultura, i para ina furma da renaschientsha sco avant tschient onns en terra rumantscha. Ils representants da la universitat da Udine han rendì attent a la partizun ladinistica. I saja la suletta universitat che possibiliteschia in doctorat en ladinistica.

Questa euforia linguistica en il Friaul ha pudi sa sviluppar pír dapi dus onns. L'onn 1999 ha il stadi talian miss en vigor la lescha 482. En quella renconuschia la Republica tut sias minoritads linguisticas, gea, ella sa declera pronta da schizunt promover quellas. In linguatg furlan n'existeva betg enfin quà. Il furlan vegniva considerà sco dialect talian. Al congress inter-ladin a Codroipo han ins creà en il temp da la globalisaziun mundiala in nov pled, ins ha discurrì da d'ina futura «glocalisaziun». Quai vul dir nagut auter che da puntuar las forzas e la dinamica che giascha en la regiun pitschna. «En il micro giascha il macro», ha in dals referents ditg e sustrastritgà l'importanza dal local e pitschen.

Terratrembel avant 25 onns

Avant 25 onns ha il mund prendì notizia d'ina regiun taliana pliost discreta. Il Friaul giascha davent dals centers balneari e turistics da l'Italia. Dus terratremels, l'emprim l'entschatta matg, il segund il settember, han scurlà quest territori, radund milli persunas han pers la vita tras questa disgrazia. Era il Grischun, oravant tut il Grischun rumantsch, è sa mussà solidaric cun ils parents linguistic. La populaziun dal Friaul discutta numnadama in linguatg neolatin sco il rumantsch, il spagnol, talian, portughès u rumen. Noss *Hendri Spescha*, lezza giada secretari da la Lia rumantscha, scriva en la *«Gazzetta Romontsch»* dals 18 da matg 1976: «L'ierta spirtala e linguistica cuminaivla da quellas traïs gruppas è indiscutabla. Ella fa dals Furlans, Ladins e Retoromantschs ina parentella, ina cuminanza da destin, frars e soras sur l'ensaina da linguatg e cultura. Da quai dattan perdetga ina roscha congress e sentupadas tant en noss pajais sco en las Dolomitas ed en il Friaul.

En il Grischun sa ragordan blers anc da l'emprim agid ch'is Ladins da las Dolomitas ed ils Retoromantschs han purtà avant 25 onns als Furlans. En las emprimas uras da la disgrazia n'hajan dentant betg ils Taliens ed auters, mabain ils agens, ils Furlans a l'ester, gidà els, han ins udì da pliras varts durant il congress a Codroipo. Il pievel furlan mussa bler idealissem per sia atgna identità e cultura.



Armonica e violina èn instruments importants da la musica furlana. Iis dus musicists sin la foto èn interprets renomads dal Friaul.




Vista en in lavoratori: Radund 80 participants han tractà dumondas da cultura, scola, lingüistica, tradiziun e legislatura dals linguatgs furlan, ladin dolomitan e rumantsch.



Duas organisaturas da l'Institut ladin-furlan «Pre Checo Placerean».



La lescha 482 dal 1999 ha sveglià il senn nazional dals Furlans.



La regiun Friuli-Veneto Giulia è duas giadas pli gronda ch'il Grischun.